
QUÆSTIO MEDICA,

CARDINALITIIS DISPUTATIONIBUS

manè discutienda in Scholis Medicorum, die

Jovis tertiâ Martii.

M. FRANCISCO PIJART, Antiquiore
Scholæ Magistro, Præsîde.

An natura paucis contenta?

I.

NULLUM corpus unum est. Sed variis ex corporibus variâ motione concitatis adornatur. Si unum esset nihil à se pateretur, sed tantum ab iis quæ extrinsecus occurrunt. Lex enim est à Deo posita, rem unamquamque eodem manere statu, nisi vi alterius rei, ab eo depellatur. Concinatum corpus variis ex corporibus, & à se & ab externis violatur. Hinc viventium corpus diversis objectum mutationibus. Hinc accretio, *μειωσις*, *ἀφασις*, & tandem mors. Plantæ nonnullæ quarum compages intima tenaciôr, diutiùs subsistunt. Animantium corpus citiùs collabitur. Humani, præ cæteris celerior est ruina. Quasi vita, quæ actionum stat multitudine, perseverantiæ brevitate compensari debeat. Plantæ stabiles nec loco motæ, dissipant minùs; longè ampliùs animalia, quæ & longè majori instrumentorum apparatu instruuntur & moventur loco. Homo præter res cum animantibus communes, cum mentem divinæ particulam auræ, obtineat, dissipationis efficaciorē causam obtinet. Hanc triplicis corporis mutationem, rei, quæ alimentum dicitur, adjectione, reparari necesse est, ad fugacem tutelam tantum, non ad diuturnum præsidium.

II.

CORPORIS humani œconomia humidis & solidis partibus constituitur & regitur. Illæ constant nusquam, sed ulque evanescent. Hæ videntur quidem consistere, sed revera

2
ejusdem sunt conditionis. Hoc est cum ex semine liquido ortum trahant, & sanguine humido conserventur: à fluidis figurantur particulis, quæ ita colligantur, ut humiditatis motu amisso, duritiem ostendant. Sed mobilissimus, & omnia pervadere aptissimus spiritus; solidas concutiens particulas, primò commovet, dein convellit, dimovet postea. Quæ humidæ sunt, cum sint *assæta*, & intestinâ, quam facit ætherea materia, cieantur motione, elabi nusquàm cessant, maxime per cutis spiracula. Brevi itaque rueret homo, ni perditam reponeret substantiam. Quod si oblitus aut coactus omittat, durat tantum aliquot dies, septem, decem, duodecim raro ultra. Hujus termini differentia, à solutioris aut compactionis, rarioris aut densioris structuræ differentiâ, nec non à spiritûs mobiliori aut moderatâ indole. Spiritus duplici re continetur aere & tenuiori sanguine. Ut vigeat diùque perseveret nec tenuis sit nec crassius, sed superficiem habeat pro ratione molis non ita magnam. Hic agit se admovens minimis fibris, actione atteritur, attritus avolat, languidumque reddit corpus. Attritio in remotione partium constituentium. Sanguis & reliqui humores sive sanguini admisti, sive ab eo separati, effluere nituntur & revera effluunt, celerius quidem, si aqueâ humiditate sint expediti. Hos etiam inertes prædatur aer, sive inspiratione receptus, sive extrinsecus per poros intrusus. Adeo ut effluvii duplex compareat causa æquè accelerans, aer externus, & intima incitatio, cui adjungitur cordis pulsio, omnium quæ in corpore fiunt pulsionum vehementissima.

III.

DE PERDITA substantia reparatur cibo & potione. Utriusque sollicitum evadit corpus, duplici impressio non in stomacho, & in faucibus. Plusquàm mirabili artificio nondum intellecto, & nusquàm forsan intelligendo, organa disposita, egestatem & desiderium cibi & potionis efformant. Quaritur utrumque & ingeritur, pro modo famis & sitis, quasi famis & sitis omnibus partibus providerent, non sibi solis. Cibus & potus ventriculo conclusus coquitur, subigitur, digeritur, non fermentatione, quæ nulla secundum naturam, non ebullitione, quæ solius est cordis, sed solâ dissolutione quæ à re dissolvante pendet. Hæc ventriculi fundum occupans omnes com-

3

missi cibi partes subit, penetrat & sejungit. Concitatur ad id opus, impetu spirituum animalium, qui jugi nervorum plexu confluunt in ventriculum. Et rei solventis, & rei solutæ conjunctione, tertium genus corporis emergit, ab utroque diversum, alias adhuc dissimilitudines passurum antequàm in utilitatem & auxilium partium abeat. Non se liberat ventriculus materiâ quam adparavit, nisi cùm hæc eadem liquidior contractas fibras laxans, spiritus contractionis autores, aut fugat, aut dissolvit, aut agit præcipientes. Liquida hæc moles ab intestinis coercita, aliquatenus siccatur, secretâ aqueâ humiditate. Inde venulæ bene multæ velût antliæ sugunt & exhauriunt liquorem, aliis vasis tradendum. Quod superest, siccatur magis, excrementum amovendum.

I V.

QUOD nutrimentum in solatium & molem partium accessit, post aliquot quietis momenta deperit, & deperire cogitur. Res nutriens vacuitatem occupans, coheret & permanet, sed frequentèr concussa à liquidis continuo allabentibus, cedit fracta vel integra. Integra redit in venas. Fracta nusquàm venis reddi apta, propter amissam molem & mollietatem debitam, ejicitur insensibili transpiratione. Scilicet corpus minus grave, magis gravibus innatans, ab iis depellitur. Sed refarcitur hæc abitio, novâ & simili appositâ materiâ, quæ effluenti debet quantitate respondere. Pauca omnino huic officio sufficit, cum jactura, quam faciunt partes non tanta sit. Hæc citâ aestimari debet, ut minima detrimenti portio iis assignetur, licet plurima fiat decessio. Distinguenda diminutio solidarum partium, à diminutione humidarum, quæ multum suæ substantiæ à naturâ deperdunt. Licet corporis sensu, appositio metienda reputetur, non tamen regula omnino certa. Ventriculus nempe consuetudinè abreptus, quasi præjudicatâ opinione teneretur, plus cibi plerumque petit, quàm expedit refarciendo damno. Peccatum tegitur bonitate corporis, cibi redundantiam propria vi expellentis, nullo consecuto incommodo. Corpus si sit debilius, labefactatur cibo supervacuo, aut opprimitur. Quæ est intemperantiæ turpis calamitas. Peccati medicinalis observatio. Hæc sæpius iteratâ compertum, paucam admodum nutrimenti copiam, corporis damna reficere, integram

valetudinem afferre & fovere,⁴ vires augere, immunitatem à morbis dare, & longam vitam largiri.

V.

NATURA scilicet paucis conservatur & valet. Ratio, duce observatione, nutrimentum procurans, quantitatem investigat & metitur virium robore, & corporis alacritate. Licet una & communis omnibus obtineri non possit mensura, propter multiplicem temperamentorum disparitatem, debilibus tamen & ad senium vergentibus, cibi modus observatione definitur duodecim unciiis aut paulò ampliùs; additâ eâdem potionis sive aquæ & vini conjunctim quantitate. Ad hanc regulam reducuntur cibi & potiones eorum, qui laboribus dediti corpus excercent nimio plùs, aut studiis vacant immodicè. Adeò ut quò vegetior est natura, & corpus acerbiori exercitatione recalescit magis, cibi & potionis mensura concedatur amplior. Consistendi occasio, virium integritas, functionum omnium libertas expeditissima. Beneficium quæsitum si non obtineatur, augendi nutrimenti est opportunitas. Si oppressio succedat aut aliqua impeditio, minuendum. Hâc arte nutrimenti paucitas invenitur, longè infra eam quantitatem quam indulgens consuetudo permisit. Ut à pravissimâ consuetudinis regulâ recedant, qui ultra modum gulæ sunt addicti, & optimam mediocritatis normam sequantur, sensim circumcidendus cibus & potus, sic convenientem sibi facient mensuram, additis aliquot unciiis debiliùm mensuræ. Hujus laboris merces amplissima, floridus faciei color, ingenii præstantia & suavitas. Nec uniùs præ aliâ, regionis est hæc mediocritas, cum in Ægypto æquè ac in Europâ observati sint viri sapientes, qui cibi librâ unâ vitam traxerint felicem & diuturnam.

Ergo natura paucis contenta.

Proponebat Lutetiæ LUDOVICUS DE VAUX, Parisinus,
Baccalaureus Medicus. A. R. S. H. 1689.

PARISIIS,
Apud Franciscum Muguet, Regis, & Facultatis Medicinæ
Typographum.